

Cheddy Lopez Henriquez-Orman 45 aña den volleyball



ORANJESTAD (AAN)- Manera Diario Deportivo a anuncia den nos edicion di Diasabra ultimo e campeonato di volleyball e aña aki lo ser dedica na sra. Cheddy Lopez Henriquez-Orman kende ta cumpliendo 45 aña den e mundo di volleyball.

Cheddy a cuminza hunga volleyball na aña 1955 na Reuver, Hulanda tempo e tabata studia pa maestra di scol.

E equipo di scol por cierto tabata un bon equipo cu tabata gana practicamente tur su weganan.

Despues di a termina su estudio Cheddy a sigui hunga volleyball na Aruba cu e equipo di maestranan di scol: Sint Thomasbond.

Otro equiponan e tempo ey tabata entre otro Rapid White, La Fama y Rapid Pink.

E tempo ey tabata hunga e campeonato riba Lago Sportpark y e seleccion di Aruba tabata bai hunga na Corsow. Na 1959 a forma e prome seleccion Arubano y Cheddy tabata forma parti di e seleccion bao guia di coach Hendrik Ponson.

Na Corsow nan a hunga na Mundo Nobo.

Despues Cheddy a bay traha na Corsow y a hunga pa e equipo di Volleymasters cu a titula diez aña campeon di Corsow.

Tambe na Corsow Cheddy tabata forma parti di e seleccion Curazoleño.

Ademas Cheddy tabata yuda

e seleccion Bonaireano contra entre otro equiponan di Venezuela.

Bek na Aruba e a hunga pa Jolly Girls cu tabata bataya fuertemente contra Rapid

Red cu e temponan ey tabata e maximo equipo na Aruba.

Na aña 1971 Aruba a forma un seleccion femenino hopi fuerte y na Cuba nan a gana medaya di brons den Weganan Panamericano.

Despues di e biahe pa Cuba Cheddy a biaha tambe pa Santo Domingo y Corsow cu e seleccion.

Na aña 1975 despues cu Cheddy a duna luz na su prome jiu e a cuminza hunga cu e equipo di Flyers cu pa hopi aña a hunga solamente comercial.

Den e encuentronan aki Flyers semper tabata un contricante fuerte y a gana hopi copa den diferente torneo.

Na aña 1995 Flyers a drenta campeonato di A.V.A. y a titula dos biaha sub-campeon di Aruba.

Awor cu Flyers a bolbe sali for di e campeonato Cheddy ta hunga comercialmente cu Flyers.

CHEDDY COMO DIRIGENTE

Cheddy a forma parti di e directiva tambe.

Na aña 1959 Cheddy tabata tesorero bao presidencia di Herman Frigeiro q.e.p.d. te cu aña 1962 ora cu e a biaha pa Hulanda.

For di 1971 te cu 1974 tabata secretaria di A.V.A. bao presidencia di Bob Lopez

Sigui lesa 30

Continuacion Pagina 28



Henriquez q.e.p.d.

Cheddy tabata tambe secretaria di Nederlands-Antilliaans Volleyball Bond den e temporada aki pa dos aña.

Na aña 1992 ora cu directiva di A.V.A. tabata completamente non-actief Cheddy hunto cu Mena y Maria Kelly y despues Leo Hillman a lucha pa añanan largo pa trece

A.V.A. bek riba pia.

Awe A.V.A. ta para dilanti un Preliminariorio di Campeonato Mundial.

Cheddy ya pa varios aña ta secretaria di A.S.U., representando A.V.A. den e directiva di A.S.U.

CHEDDY ENTRENADOR
Den Hubenil Cheddy a laga su marca atras.

For di aña 1960 e a cuminsa cu chikitonan cu tabata yama Non-Stop.

Na Corsow Cheddy semper a sigui cu teamnan escolar cu despues a drenta B-klas na Corsow.

Na 1970 Cheddy tabatin su equiponan hubenil atrobe y nan tabata train na Sint Anaschool na Noord y Diasabra cerca Hendrik Ponson na Cecilia Club.

Despues Cheddy a concentra mas riba deporte escolar.

Na 1992 Cheddy tabata presidente di CHAVA, Comision Hubenil di Aruba Volleyball Association y e a cuminsa atrobe cu team hubenil den e campeonato di A.V.A. Actualmente Cheddy tin 5 equipo den Hubenil y 1 equipo den Senior.

Ademas e tin grupo di mucha homber y mucha muher chikito na scol cu ta train pa bay den weganan di instruccion di IDEFRE y deporte escolar.

Un deseo cu Cheddy tin ta pa e por haya mas hende cu kier yuda cu e teamnan ya cu Cheddy tin planea pa entrega aki un par di aña.

Diario Deportivo ta felicita Cheddy cu e honor aki y alavez nos ta spera cu Cheddy lo sigui yuda nos hobennan pa varios aña mas ya cu nos por mira frutonan di su dedicacion.

Cheddy, pabien y hopi forza!